



Jess Svane,
Inatsisartunut ilaasortaq
Inatsisartut
/MAANI

§ 37 2015-127-imut akissuteqaat

Inatsisartut Suleriaasianni § 37, imm. 1. naapertorlugu aalisarnermut tunngasunik Naalakkersuisunut apeqquteqarputit. Apeqqutit uannut akineqartussanngortinneqarsimapput.

Apeqqutit:

1. Naalakkersuisut imartatsinni pisuussutitta suli annertunerusumik aningaasarsiutaasinnaanerat siunertaralugu sunik suliniuteqarpat?
2. Aalisakkat ullumikkut suliffissuaatitsinni suliarineqartartut nalilipparujussuarnik igitassartaanik eqqaaginnarfiusartut eqqarsaatigalugit naleqarnerulersitsisinaanermik suliniuteqartoqarniarnerluni?

Akissut:

1-imut)

Naalakkersuisooqatigiinnissamat isumaqatigiisummi ersarissumik ilaavoq misileraalluni aalisarneq sakkortusarneqassasoq, aalisarfissanillu nutaanik nassaarniarnissamik aallartitsisoqassasoq - tamatumani tunisat annertusarnissaat, taamaalillunilu nunami suliffissat amerlisarnissaat siunertaralugu. 2015-imi maajimi misileraalluni aalisarnissanut tunngasut arlallit Naalakkersuisut akuersissutigaat. Taamatut misileraalluni aalisarnerit imartatsinni pisuussutit suunerinut paasinninnissatsinnut iluaqutaasussaapput, qanorlu ililluta siunissami aalisarnitsinnik ilusilersuinissatsinnut iluaqutaasussaallutik. 2015-imi misileraalluni aalisarnerit arlallit ingerlateqqinnissaat naatsorsuutaavoq, misileraallunilu aalisarnerit nutaarluinnaat ingerlanneqartussaassallutik.

Aalisakkat nutaat Kalaallit Nunatsinni qanoq siaruarsimatiginerat paasissallugu Naalakkersuisunut immikkut pingaaruteqarpoq. Taamaammat 2015-imut 6,2 mio. kr.-inik, 2016-imullu 5,2 mio. kr.-inik Pinngortitaleriffimmut immikkoortitsisoqarpoq, tassanilu aningaasat Tunumi Kitaatalu Kujataani avaleraasartooqassutsip biologinit misissuiffiqineqarnissaanut atorineqartussaallutik. Tamatuma saniatigut aalisakkanut allanut nutaamik aalisarfiusinnaasunut paasissutissanik ingerlaavartumik katersuisoqarpoq.

2-mut)

Pisuussutitsinnik sapinngisamik annertunerpaamik atorluaasoqarnissaa Naalakkersuisunit assut pingaartinneqarpoq. Tamatumani uumassuilinnik pisuussutivut sapinngisamik isumannaatsumik atorluarnissaat, peqataanillu suliffissanik

27-05-2015
Suliap normua. 2015-115125
All. normua. 1968245

Postboks 269
3900 Nuuk
Oqarasuaat (+299) 34 50 00
Fax: (+299) 34 63 55
E-mail: apnn@nanoq.gl
www.naalakkersuisut.gl

pilersitsinissaat anguniarlugit. Taamaamat tamanna eqqarsaatigalugu Naalakkersuisut suliniutinik arlalinnik aallartitsisimapput.

Suliffissaqartitsiniarnermi periusissami atorneqalertussami suliniut 10-mut atatillugu suleqatigiissitaliamik nunaqarfinni tunitsivinnik misissuineramik suliaqartussamik pilersitsisoqarsimavoq. Tamatumani siunertarineqarpoq sumiiffinni sulisussa qarfiusuni tunisassianillu suliaqarfiusinnaasuni tunitsivinnik pitsanngorsaansamut iluarsaanissamullu periarfissaqartuni misissuinissaq.

Suliffissaqartitsiniarnermi periusissami suliniut 13-imi ilaatigut annerusumik misileraalluni aalisartoqarnissaanut aningaasanik immikkoortitsisoqarnissaanut periarfissanik misissuisoqartussaavoq, qanorlu iliorluni suliniutinik tunisassiassanik suliareqqiisinnaanerup siuarsarnissaanut aallartitsisoqarsinnaanersoq misissorlugu. Taamatut sulinermi pisuussutsinit uumassulinneersut eqqagassat pitsaanerusumik atorluarsinnaanerannut periarfissanik misissuinissaq aamma qitiutinneqartunut ilaassaaq.

Aalisakkanik tunisassiornermi eqqagassat pilersartut atorluarneqarnissaannut tunngavissaqarnerisooq Naalakkersuisunit assut soqutigineqarpoq. Taamaamat Namminersorlutik Oqartussani naalakkersuisoqarfinneersunik aalisarnermillu inuussutissarsiuteqartuneersunik inuttalimmik suleqatigiissitaliamik piaartumik pilersitsisoqassaaq. Suleqatigiissitaliaq Kalaallit Nunaanni aalisakkanik eqqagassat qanoq annertutiginerinik misissuissaaq, tunisassiornermi isumassarsianut qanoq periarfissaqartiginersoq aamma misissorneqassaaq, pisortallu qanoq ilillutik sinaakkutissanik pitsaanerusunik pilersitsisinnaanersut misissorneqarluni. Tamatumani siunertaavoq inuussutissarsiortut erseqqissumik paasiniassammassuk eqqagassanik atorluanaanissaq imminut akilersinnaassanersoq.

Naak Kalallit Nunatsinni aalisarnermi eqqagassaneersunik tunisassiortanngitsugut ilumooraluartoq "annertoorsuarmik" pisuussutininik eqqaaneq pineqanngilaq. Tassunga assersuutitut taaneqarsinnaavoq ullumikkut qalerallit niaquinik paperuinillu aasiami niuerfennut tuniniaasoqartarnera, naak tamakku siusinnerusukkut eqqaannarneqartaraluartut.

Naggasiutigalugu pisarisuukkanik eqqaasarnermut tunngatillugu erseqqissaatigineqaannassaaq eqqaanissaq kalaallit inatsisaanni pingaarnertigut akuerisaanngimmat.

Inussiarnersumik Inuulluaqqusilluta

Karl Kristian Kruse